

Na osnovu člana 23. Statuta Brčko Distrikta BiH, Skupština Brčko Distrikta BiH na 95. sjednici održanoj 14.07.2004. godine usvaja

Z A K O N

O OKUPLJANJU GRAĐANA

I OPŠTE ODREDBE

Član 1.

- (1) Ovim Zakonom uređuje se način ostvarivanja Ustavom Bosne i Hercegovine i Statutom Brčko Distrikta BiH zagarantovane slobode javnog okupljanja građana.
- (2) Sloboda okupljanja građana može se ograničiti samo u slučajevima predviđenim ovim Zakonom.

Član 2.

- (1) Okupljanjem građana, u smislu ovog zakona, smatra se sazivanje i održavanje zborova, mitinga, uličnih povorki, kulturno-zabavnih programa, sportskih takmičenja ili drugih skupova na za to primjerenom prostoru (u daljem tekstu: javni skup).
- (2) Prostorom primjerenim za javni skup smatra se prostor koji je pristupačan i pogodan za okupljanje lica čiji broj i identitet nisu unaprijed određeni i na kome okupljanje građana ne dovodi do ometanja javnog saobraćaja, ugrožavanja zdravlja, javnog morala ili bezbjednosti ljudi i imovine.
- (3) Prostorom primjerenim za javni skup smatra se i prostor na kome se odvija javni saobraćaj prevoznim sredstvima kad je moguće dodatnim mjerama obezbijediti privremenu izmjenu režima saobraćaja, kao i zaštitu zdravlja i bezbjednost ljudi i imovine.
- (4) Prostori iz stava 2 i 3. ovog člana određuju se posebnom odlukom Gradonačelnika Brčko Distrikta BiH.

Član 3.

Javni skup se ne može održavati ispred školskih ustanova dok traje nastava i ispred zdravstvenih ustanova.

Član 4.

- (1) Javni skup se može prijaviti i odvijati kao kretanje učesnika javnog skupa na određenom prostoru kad je moguće dodatnim mjerama obezbijediti privremenu izmjenu režima saobraćaja, kao i zaštitu zdravlja i bezbjednost ljudi i imovine i to samo neprekinutim kretanjem, osim na mjestu polaska i završetka.
- (2) Javni skup iz prethodnog stava se može održavati od 8 do 14 i od 18 do 23 časa i može trajati najduže tri časa.

Član 5.

- (1) Sazivač javnog skupa iz prethodnog člana dužan je da uz prijavu o održavanju javnog skupa priloži dokaz o uplati naknade troškova nastale privremenom izmjenom režima saobraćaja i drugih troškova nastalih vanrednim obavljanjem komunalnih usluga.
- (2) Visina naknade troškova određuje se posebnom odlukom Gradonačelnika Brčko Distrikta BiH.

Član 6.

- (1) Za održavanje reda na javnom skupu odgovoran je sazivač.
- (2) Poslove zaštite lične i imovinske sigurnosti učesnika javnog skupa i drugih građana, održavanje javnog reda i mira, bezbjednosti saobraćaja i druge poslove koji se odnose na obezbjeđivanje javnog skupa obavlja Policija Brčko Distrikta BiH (u daljem tekstu: Policija).
- (3) Komunalne usluge vezane sa održavanjem javnog skupa obezbjeđuje nadležni organ Vlade Brčko Distrikta BiH.

Član 7.

Sazivač javnog skupa dužan je da u skladu sa opštim propisima o naknadi štete nadoknadi svu štetu koja nastane uslijed održavanja javnog skupa.

II PRIJAVA ZA ODRŽAVANJE JAVNOG SKUPA**Član 8.**

- (1) Prijavu za održavanje javnog skupa može podnijeti svako fizičko odnosno pravno lice (u daljem tekstu: sazivač).
- (2) Prijavu za održavanje javnog skupa sazivač podnosi Policiji najkasnije pet dana prije vremena za koje je javni skup zakazan.
- (3) Prijava se podnosi lično ili preporučenom poštom. Rokovi iz stava 1 i 2. ovog člana za prijavu podnesenu preporučenom pošiljkom teku od dana prispjeća pošiljke.

Član 9.

- (1) U prijavi se moraju navesti sljedeći podaci:
 - program i cilj javnog skupa;
 - podaci o mjestu, vremenu održavanja i trajanja javnog skupa;
 - podatke o mjerama koje sazivač planira preduzeti za održavanje reda;
 - podatke o redarskoj službi koju organizuje;
 - procjenu broja učesnika javnog skupa.
- (2) Izuzetno od prethodnog stava, organizator sportskog takmičenja kao sazivač javnog skupa u prijavi sportskog takmičenja mora navesti sljedeće podatke:
 - mjesto, vrijeme održavanja i trajanja sportskog takmičenja;
 - podatke o redarskoj službi koju organizuje;
 - procjenu broja učesnika javnog skupa.

- (3) Ako sazivač prijavljuje javni skup u pokretu, u prijavi se mora navesti i detaljno određena trasa kretanja, mjesto polaska i mjesto završetka kretanja.
- (4) Kopiju prijave sazivač istovremeno dostavlja nadležnom organu Vlade Brčko Distrikta BiH iz člana 6. stav 3. ovog zakona.

Član 10.

- (1) Kad prijava ne sadrži podatke iz člana 9. ovog zakona nadležni organ upozoriće na to sazivača i odrediti mu roka da upotpuni prijavu.
- (2) U slučaju iz stava 1. ovog člana javni skup smatra se prijavljenim podnošenjem potpune prijave.
- (3) Svaka izmjena sadržine podnesene prijave smatraće se podnošenjem nove prijave.

Član 11.

Obavezi prijavljivanja sportskih takmičenja i kulturno-zabavnih priredbi ne podliježu učeničke i studentske organizacije ako se iste održavaju u prostorijama školske ustanove.

Član 12.

Stranac može sazvati i održavati javni skup, odnosno istupiti na javnom skupu, samo po prethodnom odobrenju Policije.

III ZABRANA ODRŽAVANJA JAVNOG SKUPA

Član 13.

- (1) Policija će zabraniti održavanje javnog skupa ako je on sazvan radi vršenja aktivnosti usmjerene na:
 - nasilno mijenjanje Ustavom Bosne i Hercegovine i Statutom Brčko Distrikta BiH utvrđenog poretka;
 - narušavanje teritorijalnog integriteta Brčko Distrikta BiH;
 - kršenje Ustavom Bosne i Hercegovine i Statutom Brčko Distrikta BiH zajamčenih sloboda i prava čovjeka i građanina;
 - izazivanje i podsticanje nacionalne, rasne i vjerske netrpeljivosti i mržnje;
 - vršenje krivičnih djela ili se tom aktivnošću podstiče na vršenje takvih djela;
 - narušavanje javnog reda i mira i vrijeđanje javnog morala.
- (2) Održavanje javnog skupa će se zabraniti i kada javni skup nije blagovremeno prijavljen, kad je prijavljivanje obavezno.

Član 14.

Policija može zabraniti održavanje javnog skupa ako se osnovano može očekivati da će na javnom skupu biti narušen javni red i mir ili ugrožen život ili sigurnost ljudi ili imovine, ili da će se održavanjem javnog skupa onemogućiti ili znatno otežati odvijanje javnog saobraćaja.

Član 15.

Rješenje o zabrani održavanja javnog skupa Policija donosi po pravilima upravnog postupka, s tim da se rješenje o zabrani javnog skupa sazivaču mora uručiti najkasnije u roku od 48 časova prije vremena za koje je skup zakazan.

Član 16.

- (1) Protiv rješenja o zabrani održavanja javnog skupa sazivač ima pravo žalbe Apelacionoj komisiji Brčko Distrikta BiH u roku od 24 časa od prijema rješenja.
- (2) Postupajući po žalbi, Apelaciona komisija će donijeti drugostepeno rješenje i o njemu obavijestiti sazivača i Policiju najkasnije 12 časova prije vremena za koje je skup zakazan.

Član 17.

Ukoliko Apelaciona komisija potvrdi prvostepeno rješenje o zabrani održavanja javnog skupa, sazivač skupa je dužan da odmah po prijemu rješenja obavijesti javnost o zabrani održavanja javnog skupa i da ukloni istaknute objave o sazivanju javnog skupa.

IV PREKID ODRŽAVANJA JAVNOG SKUPA**Član 18.**

- (1) Ako u toku održavanja javnog skupa nastupe okolnosti iz člana 13 i 14. ovog zakona, ili ako se javni skup održava bez prijave za održavanje, kada je prijavljivanje obavezno ili se održava i pored konačnog rješenja o zabrani održavanja javnog skupa, Policija će donijeti rješenje o prekidu održavanja javnog skupa, usmeno ga saopštiti sazivaču, narediti mu da prekine održavanje javnog skupa i da pozove okupljene građane da se razidu radi uspostavljanja reda.
- (2) Pismeni otpravak rješenja iz stava 2. ovog člana nadležni organ će dostaviti sazivaču u roku od 12 časova.
- (3) Protiv rješenja o prekidu održavanja javnog skupa sazivač ima pravo žalbe Apelacionoj komisiji Brčko Distrikta BiH u roku od 24 časa od prijema rješenja.
- (4) Postupajući po žalbi, Apelaciona komisija će donijeti drugostepeno rješenje i o njemu obavijestiti sazivača i Policiju najkasnije u roku od 48 časova.

Član 19.

Ako sazivač u slučaju iz prethodnog člana ne može da prekine održavanje javnog skupa ili odbije da to učini, mjere za uspostavljanje reda i prekidanje održavanja javnog skupa će preduzeti Policija.

V KAZNE NE ODREDBE**Član 20.**

- (1) Novčanom kaznom od 5.000 do 20.000 KM kazniće se za prekršaj pravno lice:
 1. sazivač javnog skupa koji skup održava na mjestu i u vremenu suprotno odredbama člana 3 i člana 4. stav 2. ovog Zakona
 2. sazivač javnog skupa koji nije preduzeo mjere za održavanje reda na javnom skupu, odnosno nije organizovao redarsku službu (član 6. stav 1.);
 3. koje okuplja građane bez prethodne prijave kad je prijavljivanje obavezno (član 8);
 4. sazivač javnog skupa koji održava javni skup protivno zabrani iz člana 13 i 14. ovog Zakona;
 5. sazivač javnog skupa ukoliko postupi protivno članu 17. ovog Zakona
 6. sazivač javnog skupa koji ne prekine javni skup u skladu sa članom 18 i 19. ovog zakona.
- (2) Za prekršaj iz stava 1. ovog člana kazniće se i odgovorno lice u pravnom licu novčanom kaznom u iznosu od 500 do 2.000 KM.

- (3) Za prekršaj iz stava 1. ovog člana kazniće se fizičko lice novčanom kaznom od 1.000 do 5.000 KM.

Član 21.

- (1) Novčanom kaznom u iznosu od 1.000 do 5.000 KM kazniće se stranac koji sazove ili održi javni skup, odnosno istupi na javnom skupu protivno odredbi člana 12. ovog Zakona.
- (2) Uz novčanu kaznu prekršaj iz prethodnog stava strancu se može izreći i zaština mjera udaljenja sa teritorije Brčko Distrikta BiH.

VI PRELAZNE I ZAVRŠNE ODREDBE

Član 22.

Gradonačelnik Brčko Distrikta BiH će akte iz člana 2. stav 4. i člana 5. stav 2. ovog Zakona donijeti u roku od 60 dana od dana stupanja na snagu ovog Zakona.

Član 23.

Danom stupanja na snagu ovog Zakona prestaje da važi Zakon o javnim skupovima («Službeni list SR BiH», broj 41/90 i 19/91) i Zakon o okupljanju građana («Službeni glasnik Republike Srpske» broj 21/96).

Član 24.

Ovaj Zakon stupa na snagu osmog dana od dana objavljivanja u «Službenom glasniku Brčko Distrikta BiH».

Broj: 0-02-022-206/04

Datum: 14.07.2004. god.

**PREDSJEDNIK
SKUPŠTINE BRČKO DISTRIKTA**

Mirsad Đapo